

Cu e bos di Veloushka Krozendijk

Shine Music ta presenta su produccion mas nobo: "Cerca Mi"



SHINE Music a lansa recientemente su mas reciente produccion, marcando un capitulo nobo den su trayectoria musikal. Esaki t'e prome biaha cu e agrupacion ta presenta un single interpreta pa su propio vocalista, Veloushka 'Veloz' Krozendijk, titula "Cerca Mi". E tema, un fusion di ritmo contagioso y combina, a wordo componi pa Mandy Albertsz y Boeis Flavor, cu areglo di Boeis mes na Corsou.

Veloushka ta formando parti di Shine Music pa tres aña, e mesun tempo cu e banda ta existiendo. "Cerca Mi" ta un cancion cu ta papia di e interprete cu ta haci tur posibel pa mantene e persona cu e stima cerca dje. E produccion di e cancion a tuma un total di dos luna. Aunke e cancion ya ta disponibel, ainda falta pa completa e videoclip, cu lo wordo lansa den e proximo simannan.

Despues di ricibi e letranan, e proceso di grabacion den studio a cuminsa pocopoco. Prome a integra e drumsnan, despues a graba brass y mas despues a añadi coro p'e otro miembronan di Shine. Finalmente, Veloushka a graba su parti vocal. Henter e proceso di mescla y master a wordo realisa pa Nigel Dream, kende a encarga pa duna e toque final n'e single.

Shine Music actualmente ta hopi druk. Su agenda ta practicamente yen, aunke ainda tin algun fecha disponibel pa

esunnan cu ta desea di booknan pa cualkier fiesta. E interesadonan por drenta den contacto cu nan a traves di nan pagina di Facebook, pa sigura cu Shine Music hiba su energia y ritmo n'e eventonan pidi. E banda ta gradicido na Dios, ;'e fanaticonan y cu su clientenan, kendenan a haci tur esaki posibel.

Cu un agenda yena di presentacion y e videoclip di "Cerca Mi" na caminda, Shine Music no ta musta señal di para.

